



Broj: 05/7-50-13-370-23/17

Sarajevo, 22.2.2017.

**IZVJEŠTAJ O RADU
VIJEĆA NACIONALNIH MANJINA BiH
ZA 2016. GODINU**

Parlamentarna skupština BiH je Odlukom o osnivanju Vijeća nacionalnih manjina Bosne i Hercegovine („Službeni glasnik BiH“, br. 38/06, 93/08, 53/09 i 60/14) osnovala Vijeće nacionalnih manjina BiH, kao posebno savjetodavno tijelo Parlamentarne skupštine BiH, te Odlukom o imenovanju članova Vijeća nacionalnih manjina Bosne i Hercegovine („Službeni glasnik BiH“, br. 15/08, 53/09, 59/09, 60/13 i 41/16) imenovala članove Vijeća nacionalnih manjina BiH.

Uvodne napomene

Na osnovu člana 4. stav (1) Odluke o osnivanju Vijeća nacionalnih manjina Bosne i Hercegovine, utvrđeno je da Vijeće nacionalnih manjina BiH (u daljnjem tekstu: Vijeće) daje mišljenja, savjete i prijedloge Parlamentarnoj skupštini BiH o svim pitanjima koja se tiču prava, položaja i interesa nacionalnih manjina u Bosni i Hercegovini.

Također, u skladu s članom 4. stav (2) navedene odluke, Vijeće može delegirati stručnjake u radu ustavnopravnih komisija oba doma Parlamentarne skupštine BiH, Zajedničke komisije za ljudska prava i drugih komisija i radnih tijela Parlamentarne skupštine BiH kada raspravljaju o pravima, položaju i interesima nacionalnih manjina.

U Vijeće su imenovani:

1. HALIL BICAJ (Albanac),
2. DRAGAN MARKOVIĆ (Crnogorac) od 1.2.2014.,

3. JOVANKA MANZALOVIĆ-ŠALAKA (Čehinja),
4. JAKOB FINCI (Jevrej),
5. TIHOMIR KNEŽIČEK (Italijan),
6. EVA PAŠIĆ-JUHAS (Mađarica),
7. VJEROČKA GAJIĆ (Slovakinja),
8. TODORKA JOVANOVIĆ (Makedonka),
9. VELIBOR KUVAC (Nijemac),
10. DEJAN PIOTROVSKI (Poljak),
11. HAKAN VARAN (Turčin),
12. SILVIJA VUJOVIĆ (Rumunka),
13. MARIJA GRBIĆ (Slovenka),
14. ANDRIJA SVATOK (Ukrajina),
15. MLADEN RADMILOVIĆ (Rus),
16. TIJANA VUČUREVIĆ (Rusinka),
17. NEDŽAD JUSIĆ (Rom).

Odluka je stupila na snagu 30. jula 2013. objavom u "Službenom glasniku BiH", broj 60, a Dopuna Odluke objavljena je u "Službenom glasniku BiH", broj 41/16, kojom je dodat jedan član Vijeća

18. DAVOR EBNER (Austrijanac)

1. Sjednice Vijeća nacionalnih manjina BiH

U izvještajnom periodu u toku 2016. godine Vijeće je održalo sedam redovnih sjednica koliko je i planirano:

16. sjednica održana je 21.1.2016.
17. sjednica održana je 1.4.2016.
18. sjednica održana je 26.5.2016.
19. sjednica održana je 22.7.2016.
20. sjednica održana je 19.9.2016.
21. sjednica održana je 11.11.2016.
22. sjednica održana je 23.12.2016.

Sve sjednice sazvaio je i vodio predsjedavajući Vijeća nacionalnih manjina BiH Tihomir Knežiček.

Na sjednicama se raspravljalo o tačkama koje su bile predviđene Programom rada Vijeća za 2016. godinu, kao i o drugim tekućim pitanjima koja se tiču nacionalnih manjina u toku 2016. godine, i to prvenstveno: definiranje i prijedlog kriterija za izbor članova Vijeća nacionalnih manjina BiH, aktivnosti u vezi sa izradom izmjene Zakona o pravima pripadnika nacionalnih manjina, izrada i predlaganje izmjene Izbornog zakona, praćenje objavljivanja rezultata popisa stanovništva iz 2013. godine, izrada plana posjeta institucijama za zaštitu prava nacionalnih manjina izvan BiH, finansiranje rada Vijeća, rezultati saradnje s lokalnim i međunarodnim institucijama itd.

Sve sjednice održane su u planirano vrijeme i na svakoj sjednici bio je potreban kvorum članova. Od 20. sjednice Vijeće ima 18 članova prijemom jednog predstavnika austrijske nacionalne manjine u Vijeće. Prisustvo članova Vijeća sjednicama iznosi 87,67%. Sastanci Vijeća organiziraju se uz značajnu stručnu i tehničku pomoć Ureda sekretara Zajedničke komisije za ljudska prava.

2. Priprema i izrada dokumenata

U izvještajnom periodu pripremljeni su i izrađeni sljedeći dokumenti:

- **Plan rada Vijeća za 2016. godinu**

Na osnovu iskustava u dosadašnjem radu Vijeća i procjene aktivnosti koje bi Vijeće trebalo realizirati u narednom periodu, predsjedavajući je predložio Plan rada Vijeća za 2016. godinu, koji je Vijeće usvojilo na 16. sjednici, održanoj 21.1.2016.

- **Izveštaj o radu Vijeća nacionalnih manjina za 2015. godinu**

Izveštaj o radu Vijeća nacionalnih manjina za 2015. godinu usvojen je na 16. sjednici Vijeća, kao i na 18. sjednici Zajedničke komisije za ljudska prava, te 27. sjednici Predstavničkog doma i na 18. sjednici Doma naroda Parlamentarne skupštine BiH.

- **Izveštaj o mjerama Evropske povelje o manjinskim jezicima**

Predsjedavajući Vijeća je, na zahtjev Ministarstva za ljudska prava i izbjeglice BiH, 25.1.2016. pripremio i dostavio informacije tražene upitnikom prema Bosni i Hercegovini, koji je uputilo Vijeće Evrope - Sekretarijat za regionalne i manjinske jezike. Cilj upitnika je priprema monitoringa DRUGOG IZVJEŠTAJA BOSNE I HERCEGOVINE O

PROVOĐENJU MJERA I PRINCIPA UTVRĐENIH EVROPSKOM POVELJOM O REGIONALNIM ILI MANJINSKIM JEZICIMA. Drugi izvještaj usvojilo je Vijeće ministara BiH 25.8.2015. i on je upućen Vijeću Evrope. Standardna procedura Vijeća Evrope je da obavi monitoring i ocijeni da li je Vijeće Evrope realiziralo predložene mjere. Sastanak s Vijećem nacionalnih manjina BiH, kada je obavljen monitoring, bio je 4.4.2016., a u delegaciji Vijeća Evrope bili su: Aleksandra Oszmiańska-Pagett, profesor Stefan Oeter i Hedina Sijerčić.

- **Državni izvještaj BiH o provođenju Konvencije o zaštiti nacionalnih manjina**

Članovi Vijeća, na zahtjev Ministarstva za ljudska prava i izbjeglice BiH, dostavili su 24.5.2016. podatke za dokument ČETVRTI IZVJEŠTAJ BiH O ZAKONODAVNIM I DRUGIM MJERAMA NA PROVOĐENJU PRINCIPA UTVRĐENIH U OKVIRNOJ KONVENCIJI ZA ZAŠTITU NACIONALNIH MANJINA. Nacrt je završen u junu 2016. godine. Zbog nesistematičnosti dokumenta i neujednačene metodologije, broja i vrste podataka koji trebaju biti u izvještaju, Vijeće je Ministarstvu za ljudska prava i izbjeglice BiH ukazalo na potrebu rješavanja ovog problema do izrade sljedećeg državnog izvještaja.

- **Kriteriji za izbor članova Vijeća nacionalnih manjina**

S ciljem prevazilaženja problema nedostatka pisanih kriterija za izbor predstavnika nacionalnih manjina u Vijeće, Vijeće je nakon višemjesečnog rada, i u saradnji s udruženjima nacionalnih manjina u BiH, na 17. sjednici prihvatilo prijedlog kriterija koji je upućen Zajedničkoj komisiji za ljudska prava, nadležnoj za imenovanje članova Vijeća nacionalnih manjina BiH. Zajednička komisija je na 30. sjednici, održanoj 17.10.2016., razmatrala prijedlog kriterija, ali ga nije prihvatila, ne navodeći razloge. Vijeće nacionalnih manjina je ponovo na 22. sjednici, održanoj 23.12.2016., usvojilo zaključak da u narednom periodu uputi Prijedlog izmjena i dopuna Odluke o osnivanju Vijeća nacionalnih manjina, koje će se odnositi na kriterije prema kojima se vrši izbor članova Vijeća nacionalnih manjina BiH.

3. Priprema i izrada inicijativa

U izvještajnom periodu razmatrane su i upućene u proceduru sljedeće inicijative:

- **Inicijativu za izradu prijedloga izmjene Izbornog zakona**

Vijeće je pokrenulo inicijativu za izradu prijedloga izmjene Izbornog zakona, a na 16. sjednici, održanoj 21.1.2016., razmatran je prijedlog izmjene Zakona, koji je u radnoj formi dostavljen Uredu sekretara Zajedničke komisije i Interresornoj radnoj grupi za izmjenu Zakona. Vijeće je u 2015. godini predložilo Interresornoj radnoj grupi da jedan predstavnik Vijeća bude član radne grupe, što je i prihvaćeno, s tim da predstavnik Vijeća nema pravo glasa u postupcima odlučivanja izmjene Izbornog zakona. Vijeće je dostavilo prijedlog za izmjene Zakona koji se oslanjao na ranije dostavljeni prijedlog koalicije KOMA Interresornoj radnoj grupi, uz dodatak koji je Vijeće definiralo kao potrebu za popravkom Zakona. Interresorna radna grupa nije razmatrala prijedlog Vijeća s obzirom na to da je Zakon praktično zadržan u formi koja je izuzetno diskriminirajuća po pitanju izbornih prava pripadnika nacionalnih manjina.

- **Inicijativa za održavanje konferencije s ciljem definiranja uslova pripadnosti pojedinaca grupi nacionalnih manjina**

Još tokom 2015. godine pokrenuta je inicijativa za održavanje konferencije s ciljem definiranja uslova pripadnosti pojedinaca grupi nacionalnih manjina. Planirano je da se konferencija održi najkasnije do maja 2016. godine i formiran je tim za pripremu konferencije. Inicijativa je obustavljena zbog prijedloga Ministarstva za ljudska prava i izbjeglice da se konferencija inkorporira u konferenciju na kojoj će se razmatrati potreba promjene Zakona o zaštiti prava pripadnika nacionalnih manjina BiH. Umjesto konferencije održan je okrugli sto o temi: „Analiza i potreba izrade izmjena i dopuna Zakona o zaštiti prava pripadnika nacionalnih manjina iz 2003. godine“ koji je održan na Vlašiću 18.10.2016., na kojem je učestvovalo 11 članova Vijeća. S obzirom na to da okrugli sto nije rezultirao definiranim uslovima pripadnosti pojedinca grupi nacionalnih manjina, planirano je da se tokom 2017. godine održi konferencija koja bi dala odgovor na pitanje koji se građani smatraju pripadnicima nacionalnih manjina u BiH.

- **Inicijativa za saradnju s međunarodnim organizacijama koje se bave pitanjima nacionalnih manjina**

Shodno planu aktivnosti Vijeća za 2016. godinu izvršene su pripreme za službenu posjetu Vladinom vijeću za nacionalne manjine Češke Republike. Uspostavljen je kontakt s Vladinim vijećem u Pragu i kontaktiran OSCE u Sarajevu sa zahtjevom za logističkom podrškom posjete Češkoj Republici. Inicijativa s obrazloženjem, finansijskom projekcijom i svim traženim

informacijama upućena je Kolegiju Sekretarijata PSBiH 4.10.2016. Za ove namjene bila su osigurana sredstva u budžetu za rad Vijeća u 2016. godini. Do 31.12.2016. nije stigao nikakav odgovor na ovu inicijativu, čime nije ispunjen dio plana aktivnosti Vijeća koji se odnosi na saradnju s domaćim i međunarodnim organizacijama koje se bave pitanjima nacionalnih manjina.

- **Inicijativa za poštivanje Odluke o utvrđivanju troškova rada Vijeća**

Vijeće je podnijelo inicijativu za poštivanje Odluke o utvrđivanju troškova rada Vijeća, broj: 03/5-50-14-11-11,8/16, od 14.6.2016., koju je donijela Zajednička komisija za administrativne poslove PSBiH. Navedenom odlukom jasno je precizirano na koji način se određuju naknada za rad članova Vijeća, ali Zajednička služba nadležna za isplate naknada nije ispoštovala Odluku. Vijeće je uskraćeno za isplate za rad članova za ukupno 5 mjeseci. Na podnesene inicijative za rješavanje problema (upućene 28.11.2016. i 15.12.2016.) do 31.12.2016. Vijeće nije zaprimilo pisani odgovor.

- **Inicijativu za raspodjelu troškova rada Vijeća za 2017. godinu**

Na zahtjev Zajedničke komisije za administrativne poslove PSBiH Vijeće je pripremlilo prijedlog raspodjele troškova za 2017. godinu koji je baziran na instrukciji Zajedničke komisije za administrativne poslove, prema kojoj Vijeće ima na raspolaganju 28.000,00 KM za aktivnosti u 2017. godini. Prijedlog je prihvaćen.

Na osnovu rezultata realizacije predloženih inicijativa prema parlamentarnim tijelima BiH, zaključuje se da **od pet inicijativa datih u 2016. godini četiri nisu prihvaćene od nadležnih institucija, a prihvaćena peta inicijativa bila je formalne prirode.** Ovakav odnos institucija BiH prema Vijeću potvrđuje zaključke u Izvještaju Evropske komisije o napretku BiH za 2015. godinu u Poglavlju 2.4. koje se odnosi na zaštitu manjina i nepovoljan položaj Vijeća (str. 26).

Vijeće u 2017. godini očekuje promjenu stanja i kvalitetnije uvažavanje prijedloga koje daje kao savjetodavno tijelo pri Parlamentarnoj skupštini BiH.

- **Inicijativa za dostavljanje podataka o broju pripadnika nacionalnih manjina u BiH**

Vijeće je uputilo zahtjev Agenciji za statistiku Bosne i Hercegovine da dostavi podatke o broju pripadnika nacionalnih manjina u BiH na osnovu popisa stanovništva u BiH provedenog 2013.

godine, što se odnosi na podatke u dijelu 3.3. (STANOVNIŠTVO PREMA ETNIČKOM/ NACIONALNOM IZJAŠNJAVANJU I SPOLU, nivo općine u BiH) svrstani u kolonu **Ostali**. Agencija je dostavila odgovor da nema razvrstanu grupu građana koji su u popisu stanovništva evidentirani kao „ostali“, te da će ova vrsta informacija biti objavljena na zvaničnoj internetskoj stranici Agencije za statistiku BiH do 31.12.2016. Ovi podaci nisu objavljeni do navedenog datuma.

- **Inicijativa za donošenje Zakona o Vijeću nacionalnih manjina u BiH**

Vijeće nacionalnih manjina na 22. sjednici, održanoj 23.12.2016., razmatralo je i nije podržalo inicijativu za donošenje Zakona o Vijeću nacionalnih manjina u BiH koju je predložio Nedžad Jusić, a zaključeno je da se slabosti načina izbora članova Vijeća mogu popraviti dopunom Odluke o osnivanju Vijeća.

4. Sastanci

- Tihomir Knežiček prisustvovao je u ime Vijeća sastancima Izvršnog odbora projekta Vijeća Evrope pod nazivom „Zaštita prava nacionalnih manjina Jugoistočne Evrope“ koji su održani u Sarajevu 11.1.2016., a Jovanka Manžalović-Šalaka u Podgorici 6.4.2016., u Strazburu 11. i 12.10.2016. i Tirani 16. i 17.11.2016.
- Dana 9.2.2016. u Sarajevu je održan sastanak s ministricom za ljudska prava i izbjeglice BiH Semihom Borovac i predstavnicima Vijeća nacionalnih manjina BiH (sedam predstavnika), Vijeća nacionalnih manjina Narodne skupštine Republike Srpske (pet predstavnika) i Saveza nacionalnih manjina Republike Srpske (pet predstavnika). Tema sastanka je nastavak saradnje Ministarstva s tijelima nacionalnih manjina i mogućnosti finansiranja projekata koje bi realizirala udruženja nacionalnih manjina u BiH. Upornim zalaganjem Vijeća, raspravama na sjednicama i sastancima te na osnovu prijedloga udruženja nacionalnih manjina, u budžetu Ministarstva za ljudska prava i izbjeglice BiH promijenjena je budžetska stavka u vezi s grantovima za udruženja nacionalnih manjina u iznosu od 70.000,00 KM namijenjenih za druge nacionalne manjine osim romske. Objavljen je javni poziv za prijave projekata i 30.12.2016. potpisani su ugovori sa uspješnim udruženjima i savezima nacionalnih manjina u BiH za realizaciju predloženih aktivnosti.

- Članovi Vijeća Dejan Piotrovski i Jovanka Manzalović-Šalaka učestvovali su na sastanku s institutom ECRI koji je održan 13.3.2016. u zgradi Parlamenta.
- Članica Vijeća Jovanka Manzalović-Šalaka u ime Vijeća učestvovala je na sastanku s Astrid Thors, visokom komesarkom OSCE-a za nacionalne manjine održanom u Sarajevu 21.3.2016. Tema sastanka bio je opći položaj nacionalnih manjina u BiH i način funkcioniranja Vijeća. Članica Vijeća Jovanka Manzalović-Šalaka u ime Vijeća primila je 9.5.2016. zahvalnicu Astrid Thors za uspješnost u prikupljanju informacija tokom posjete gde Thors Bosni i Hercegovini.
- Dana 20.4.2016. održan je sastanak predsjedavajućeg Vijeća Tihomira Knežičeka s članovima Zajedničke komisije za administrativne poslove i sekretarima Zajedničke komisije za administrativne poslove i Zajedničke komisije za ljudska prava (Ured sekretara Zajedničke komisije za ljudska prava pruža stručnu i tehničku podršku radu Vijeća) o utvrđivanju troškova rada Vijeća. Na sastanku je usaglašen način obračuna troškova rada Vijeća, što je 14.6.2016. formalizirano Odlukom o utvrđivanju troškova rada Vijeća. Odlukom je utvrđen način obračuna naknada za rad u Vijeću, ali se definirani način obračuna ne poštuje pa je, nakon više bezuspješnih pismenih zahtjeva i usmenih razgovora, Vijeće 28.12.2016. podnijelo zvaničnu inicijativu za poštivanje Odluke o utvrđivanju troškova rada Vijeća.
- U organizaciji Ministarstva za ljudska prava i izbjeglice BiH 18.5.2016. održan je sastanak o izradi Četvrtog izvještaja Bosne i Hercegovine o zakonodavnim i drugim mjerama na provođenju principa utvrđenih u Okvirnoj konvenciji za zaštitu nacionalnih manjina Vijeća Evrope. Učesnici su bili i predstavnici Vijeća nacionalnih manjina BiH.
- U 2016. godini održana su četiri sastanka sa osobljem Ureda sekretara Zajedničke komisije za ljudska prava na kojima se razgovaralo o pripremama sjednica Vijeća, realizaciji aktivnosti u nadležnosti Ureda, izradi dokumenata i realizaciji logističkih pitanja (službena putovanja, priprema formulara za naplate troškova, slanje poziva za sjednice, slanje materijala i dopisa i slično).
- Član Vijeća Jakob Finci u ime Vijeća u Sarajevu je učestvovao na sastanku s visokim komesarom za nacionalne manjine OSCE-a. Sastanku su prisustvovali Romana Schweiger, Senior Legal Adviser i osoblje Misije OSCE-a u BiH.

4. Rad s medijima

U izvještajnom periodu aktivnosti Vijeća objavljujane su u štampanim i elektronskim medijima, a najviše na internetu:

- Tihomir Knežiček učestvovao je 12.1.2016. u snimanju TV emisije „Hod vjekova“ RTVTK, koja tretira kulturu i tradiciju nacionalnih manjina na području Tuzlanskog kantona. Emisija je emitirana u februaru 2016. godine.
- Tihomir Knežiček bio je gost emisije „U Fokusu“ RTRS-a koja je emitirana 15.1.2016.
- Portal M12.BA, Bljesak.info i drugi su 21.1.2016. objavili da je Vijeće nacionalnih manjina BiH usvojilo Izvještaj o radu za 2015. godinu, kao i Prijedlog orijentacionog plana rada Vijeća nacionalnih manjina BiH za 2016. godinu.
- Portal Sarajevo-RS je 21.1.2016. objavilo da će Vijeće nacionalnih manjina BiH dostaviti prijedlog za izmjenu Izbornog zakona BiH Interresornoj radnoj grupi za izmjenu izbornog zakonodavstva i Centralnoj izbornoj komisiji BiH.
- Večernji list je 9.2.2016. objavio članak o prvom sastanku ministrice Semihe Borovac s predstavnicima Vijeća nacionalnih manjina u BiH.
- FENA je 26.5.2016. objavila članak koji su preuzeli mnogi mediji, a u kojem se navodi da je Vijeće nacionalnih manjina Bosne i Hercegovine donijelo odluku da se u parlamentarnu proceduru uputi inicijativa za izmjene i dopune Izbornog zakona BiH, u dijelu koji se odnosi na učešće pripadnika nacionalnih manjina u izborima za općinski nivo.

Zbog nedovoljne vidljivosti Vijeća nacionalnih manjina, kao značajnog parlamentarnog tijela u BiH, traženo je još 2015. godine od Sektora za odnose s javnošću PSBiH poboljšanje dizajna internetske stranice Parlamentarne skupštine BiH. Vijeće je ponudilo konkretna rješenja, a promjena stranice nije poboljšala vidljivost Vijeća jer je ostala na drugom nivou menija (u grupi Druga parlamentarna tijela).

5. Ostale aktivnosti Vijeća nacionalnih manjina BiH

- Nije bilo aktivnosti u vezi sa usvajanjem Strateške platforme za rješavanje pitanja nacionalnih manjina u BiH. Dokument je završen, ali ga nisu usvojile nadležne institucije u Republici Srpskoj, pa tako nije razmatran na sjednici Vijeća ministara BiH koje je nadležno za usvajanje navedene strategije. Strategija je rađena godinama, a

Vijeće je sve vrijeme bilo uključeno u njenu izradu učešćem u radnim grupama i raspravama na samim sjednicama Vijeća.

- Članovi Vijeća učestvovali su u obilježavanju Međunarodnog dana sjećanja na žrtve holokausta 27.1.2016. u Sarajevu.
- Članovi Vijeća učestvovali su na konferenciji „IMAMO I MI PRAVO NA IZBOR – izmjene i dopune Izbornog zakona BiH – ljudska prava nacionalnih manjina i ostalih”. Konferencija je jedna od aktivnosti zagovaračke kampanje Donošenje izmjena i dopuna Izbornog zakona u domenu izbornih prava nacionalnih manjina, koju realiziraju Fondacija za socijalno uključivanje u BiH (FSU u BiH) i Inicijativa za bolju i humaniju inkluziju (IBHI) u okviru Projekta održivosti civilnog društva. Konferencija je održana u Sarajevu 15.3.2016.
- Predsjedavajući Vijeća uradio je anketu o temi: „Prava pripadnika nacionalnih manjina u Bosni i Hercegovini - normativno i stvarno“, koju je 25.3.2016. realizirao Bojan Vlaški, viši asistent Pravnog fakulteta Univerziteta u Banjoj Luci.
- Vijeće je na 17. sjednici, održanoj 1.4.2016., analiziralo informaciju o odbijanju verifikacije članova Vijeća nacionalnih manjina Federacije Bosne i Hercegovine. Iako je federalno vijeće nacionalnih manjina konstituirano 18.3.2016., njegova zvanična verifikacija nije objavljena u službenim novinama. Članovi Vijeća nacionalnih manjina BiH iskazali su nezadovoljstvo procesom izbora članova Vijeća Federacije BiH, s obzirom na to da u proceduri izbora nije bilo javnog poziva za kandidiranje u članstvo Vijeća.
- Član Vijeća Nedžad Jusić je u ime romske nacionalne manjine učestvovao na svečanosti obilježavanja Svjetskog dana Roma (8. april) 2016. godine, koja je tim povodom održana u Domu kulture u Živinicama, u organizaciji Ministarstva obrazovanja, nauke, kulture i sporta Tuzlanskog kantona i Druge osnovne škole Živinice.
- Na poziv načelnika Općine Prnjavor, predsjedavajući Vijeća Tihomir Knežiček učestvovao je kao gost na VII. festivalu nacionalnih manjina općine Prnjavor, koji je održan 30.7.2016.
- Predsjedavajući Vijeća je na poziv Saveza nacionalnih manjina Republike Srpske učestvovao na manifestaciji „Trinaesta smotra kulturnog stvaralaštva nacionalnih manjina“ koja je održana 24.9.2016. u Banjoj Luci.

- Predsjedavajući Vijeća je na poziv Saveza nacionalnih manjina Republike Srpske učestvovao na manifestaciji „Smotra nacionalnih manjina u Šibovskoj“ koja je održana 30.9.2016. u Šibovskoj kod Prnjavora.
- Članovi Vijeća učestvovali su na obilježavanju 20 godina rada Udruženja „Češka beseda“ Sarajevo. Skup je održan u Info Centru EU u Sarajevu 5.10.2016.
- Jedanaest članova Vijeća učestvovalo je 11.10.2016. na Vlašiću na okruglom stola o temi: „Analiza i potreba izrade izmjena i dopuna Zakona o zaštiti prava pripadnika nacionalnih manjina iz 2004. godine“. Skup je održan u organizaciji Ministarstva za ljudska prava i izbjeglice BiH, a u okviru planiranih aktivnosti Vijeća ministara BiH za 2016. godinu. Predsjedavajući Vijeća je za potrebe realizacije okruglog stola pripremio i prezentirao analizu zakonske regulative u zemljama Evrope koja se odnosi na zaštitu prava nacionalnih manjina.
- Predsjedavajući Vijeća je u ime Vijeća radio na popunjavanju upitnika za Izvještaj „Promocija regionalnih i manjinskih jezika u Evropi“ za potrebe Parlamentarne skupštine Vijeća Evrope – izvjestilac Rozsa Hoffmann. Upitnik je završen i poslan u predviđenom roku 26.10.2016.
- Član Vijeća Dragan Marković učestvovao je u pripremi i realizaciji Festivala tolerancije, koji je održan u Doboju 16.11.2016.
- Vijeće je razmatralo obavještenje Komisije za odlučivanje o sukobu interesa PSBiH od 16.11.2016. u kojem se traži od članova Vijeća da dostave finansijski izvještaj za 2016. godinu. S obzirom na to da je prvi put da se od Vijeća traži da članovi podnesu finansijski izvještaj, Vijeća je uputilo zahtjev za tumačenje Komisiji za odlučivanje o sukobu interesa o tome da li članovi Vijeća spadaju u kategoriju zvaničnika koji podnose Izvještaj. Dana 9.12.2016. odgovoreno je da članovi Vijeća imaju status izabranog zvaničnika i time imaju obavezu izvještavanja.
- U ime Vijeća pripremljene su zahvalnice Vijeću Evrope, UNDP-ju i OSCE-u za doprinos u djelovanju i radu Vijeća nacionalnih manjina BiH. Vijeću Evrope dodijeljena je zahvalnica 17.11.2016. u Tirani, a UNDP-ju i OSCE-u bit će uručene početkom 2017. godine.
- Članovi Vijeća učestvovali su na manifestaciji Četvrti dani nacionalnih manjina u gradu Sarajevu od 29.11. do 3.12.2016., a u okviru Minority Festa koji organizira Vijeće nacionalnih manjina Kantona Sarajevo, u saradnji s Gradom Sarajevom, Federalnim ministarstvom kulture i sporta i Evropskom unijom.

- Predsjedavajući Vijeća Tihomir Knežiček učestvovao je na konferenciji povodom Međunarodnog dana ljudskih prava, koja je održana u Sarajevu 9.12.2016. Konferenciju pod nazivom „Obrazovanje kao mjera prevencije protiv radikalizacije i ka izgradnji inkluzivnog društva“ organiziralo je Ministarstvo civilnih poslova BiH u saradnji s Vijećem Evrope.
- Članovi Vijeća učestvovali su na javnoj debati „ManjiNE“ koja je održana u Sarajevu 12.12.2016. Debata je održana u okviru projekta održivosti civilnog društva, a u realizaciji Fondacije za socijalno uključivanje u Bosni i Hercegovini (FSU u BiH) i Inicijative za bolju i humaniju inkluziju (IBHI).
- Predsjedavajući Vijeća je 22.12.2016. uradio analizu prijave na javni poziv za projekte koji je raspisalo Ministarstvo za ljudska prava i izbjeglice za udruženja nacionalnih manjina u BiH. Analiza je prezentirana na 22. sjednici Vijeća sa zaključkom da je projekte prijavio mali broj udruženja. Mišljenje o tome da je razlog slabog odziva u složenoj aplikativnoj formi bilo je podijeljeno. Drugi razlozi koji se navode za neodazivanje pozivu su nedostatak ljudstva u udruženjima i kratak rok za prijavu projekta.
- Vijeće je na 22. sjednici, održanoj 23.12.2016., razmatralo Informaciju o aktivnostima u vezi s Inicijativom za izmjenu Zakona o zaštiti prava pripadnika nacionalnih manjina BiH, te primilo k znanju informaciju da se postojeći Zakon o zaštiti prava pripadnika nacionalnih manjina BiH neće mijenjati.
- **Predstavnici Vijeća nacionalnih manjina kao i svih prethodnih godina nisu pozivani na obilježavanje državnih i vjerskih praznika koje su organizirali državni, politički i vjerski zvaničnici u Bosni i Hercegovini tokom 2016. godine.**
- **Zajednička komisija za ljudska prava nije konsultirala Vijeće u procesu odlučivanja prijema novog člana u Vijeće i donijela je Odluku o prijemu predstavnika austrijske nacionalne manjine kao 18. člana Vijeća.**

Vijeće nacionalnih manjina BiH realiziralo je sve aktivnosti koje su bile u direktnoj nadležnosti Vijeća i koje su predviđene Planom rada Vijeća za 2016. godinu. Također, Vijeće je realiziralo i niz aktivnosti koje nisu bile predviđene Planom rada.

Predsjedavajući Vijeća nacionalnih manjina BiH
prof. dr. Tihomir Knežiček